

1 Təsalonaikə
Nauəuə iətəm Pol təmaupən mətei
tuvən kəm nəfaki mın ikin
Təsalonaikə
Nəghatiən əkuəkir rəha nauəuə
u 1 Təsalonaikə

? Pəh təmətei nauəuə u? Aposil Pol təmətei nauəuə u.

? Təmətei tətuvən kəm pəh? Təmətei tətuvən kəm niməfaki əpəha Təsalonaikə.

? Natigian təhro lanu nian təmətei? Pol təmətuəuin niməfaki əpəha Təsalonaikə e nu keiu o kisil əmə tınuvən rəkis, kəni in niməfaki vi kəti. Nətəmimi rəha niməfaki okotəkeikei moteviə e nəmiəgəhiən rəhalah. İlah nəuvein, kəməhuvən e nian iəkis mın mətəu-inu kəutəhatətə e Krısto. Kəni nəuvein kəsotəhrun vivian nian iətəm İesu otitəlig=pa mın lan e nəhue niftəni. Nəuvein nıkilah təhti məmə İesu otuva uəhai mın əmə. Kəni motəruru məmə nətəmimi kəmoħmıs uərisig e İesu titəlig=pa mın, otəhro e lah.

? Təmətei nauəuə u o nak? Pol təmətei nauəuə u məmə otəfəri nətəligian rəhalah, kəni mol nəhatətəian rəhalah təskasik. Kəni molkeikei məmə otəfən nəgətunian nəuvein iətəm təhruahru o nitəlig=pa minian rəha İesu Krısto.

Pol təməni təuvir kəm lah

¹ İəu Pol, mıne Sailəs,* mıne Timoti, iəhləni təuvir kəm təmah mın u niməfaki ikin Təsalonaikə,

* **1:1** E nəghatiən Kris, nərgin u Sailəs in “Silfanus”

u itəmah u nətəmimi rəha Tatə Uhgın mine İərmənig İesu Kristo.

Pəh Uhgın otətuati e rəhan nəuviriən mine nəməlinuian kəm təmah.

² Nian rəfin, iəhləni=pən kəm Uhgın məmə nikitimahəl tətəgiən o təmah rəfin, kəni məhləfaki o təmah e nəfakiən rəhatimahəl.

³ Nian iəhləfaki kəm Tatə Uhgın, nikitəmahəl tagiən mətəu-inu nian rəfin nikitimahəl tətəhti nati kisil, kəti u rəhatəmah uək iətəm tatsipən e nəhatətəiən rəhatəmah, mine rəhatəmah uək əskasik o nasiruiən e nətəmimi iətəm tatsipən e nolkeikeiən rəhatəmah, mine noliən rəha nəhtul əskasikiən rəhatəmah e nian iəkis min iətəm kəutəhuva e rəhatəmah nəmiəgəhiən, kəni nəkotol lanəha mətəu-inu nəmotələhu=pən əskasik rəhatəmah nətəligiən e İərmənig İesu Kristo.

⁴ Piak min mine nəuvinik min iətəm Uhgın tolkeikei itəmah. Nikitimahəl tagiən min o təmah mətəu-inu iəkləhrun məmə Uhgın təmitəpən itəmah.

⁵ Kəni iəkləhrun nati u, mətəu-inu nanusiən təuvir iətəm iəməhləni kəm təmah, səniəmə təmuva e nəghatiən əmə, mətəu təmuva min e nəsanəniən, mine Narmın Rəha Uhgın, kəni kitah kotəhrun vivi məmə in nipəhriənien. Kəni nian kitah kəməutatig, nəkotəhrun məmə noliən rəhatimah in təuvir məmə otasiru e təmah.

⁶ Kəni iəmleruh məmə itəmah nəmotisikəuvin itimahəl mine İərmənig e noliən u: nəmotos pau nahməiən asoli, mətəu nəmotos nəghatiən e nikin agiən iətəm Narmın Rəha Uhgın təməfinə.

⁷ Tol lanəha, e noliən rəhatəmah nəmotəgətun suaru təuvir kəti kəm nəfaki min əpəha Masetoniə

mine Akaiə kotisikəuvin itəmah.

⁸ Nəmotəni pətigəm nəghatiən rəha Uhgın təhmen e təui təmasək kətəu ikin min rəfin, kəni səniəmə əpəha Masetoniə mine Akaiə əmə, mətəu nətəmimi ikin min rəfin kınotəhrun rəkis rəhatəmah nəhatətəiən. Tol lanəha, iəsləni pətigəmiən nanusiən rəha nəhatətəiən rəhatəmah,

⁹ mətəu-inu nətəmimi rəha Masetoniə mine Akaiə, ilah aru kətəni pətigəm məmə nian iəməhuva moteruh itəmah, nikitəmah tagiən o nətəuiən nəghatiən rəhatimahal. Kətəni pətigəm məmə itəmah nəmotəuhlin nəmtəhtəmah e narmi nati min u kəmol əmə ilah, kəni məutəhuərisig e Uhgın iətəm tətəmiəgəh, kəni in Uhgın pəhriən,

¹⁰ kəni nəutəhtahnin Nətin məmə otitəlig=pa min e negəu e neai muva min e nəhue niftəni. Nətin u in Iesu, iətəm tətəmiəs e nigə kəluau, kəni Uhgın təmosmiəgəh in e nimisiən. Kəni in otosmiəgəh itah e nalpiniən mine niəməha rəha Uhgın iətəm tətəuə.

2

Uək rəha Pol əpəha Təsalonaiyə

¹ Piak min mine nəuvinik min. Nəkotəhrun məmə nian itimahal iəmluva mihleruh itəmah, nuvaiən rəhatimahal, in səniəmə tol nati əpnəpin əmə lan, mətəu təmol nəuan.

² Kəni itəmah nəkotəhrun məmə inəha Filipai, nətəmimi kəmotol tərəh e timahal, kəni motəhi motəni rah itəmahal, mətəu Uhgın rəhatah təmasiru e timahal, kəni itimahal iəsləginiən e nəni pətigəmiən rəhan nanusiən təuvir kəm təmah, nati

əpnapın nətəmimi kəmotalkut məmə okotəniəhu itimahal.

³ Tol lanəha mətəu-inu rəhatimahal nəghatiən o niuviən rəhatəmah nətəligiən təsisipəniən e nətəligiən tərəh mın uə nikin iətəm təsəhruahruiən, kəni iəslalkutiən o neiuəiən e təmah.

⁴ Kəpə, iəsloliən lanəha. Mətəu nian iəhləghati, iəkləhrun məmə Uhgın təməsal=pən rəkis e nikitimahal, kəni məni məmə itimahal iəkləhmen məmə iəkləni pətigəm nanusiən təuvir, kəni in təmələhu=pən e nəhlməitimahal. Kəni iəsləghatiən məmə nətəmimi nikelah otagiən o timahal, mətəu iəhləghati məmə Uhgın nikin otagiən o timahal, kəni in Uhgın iətəm tətəsal=pən e nikitimahal.

⁵ Nəkotəhrun məmə itimahal iəsluvaian o təmah məmə iəkliuvi nətəligiən rəhatəmah e nəghatiən ətəhiən mın. Kəni iəsləni pətigəmiən nanusiən təuvir kəm təmah məmə iəklos rəhatəmah məni. Kəni Uhgın, in təhrun nikitimahal məmə nəghatiən u in nıpəhriənien.

⁶ Itimahal iəsluvaian məmə itəmah kəti uə iətəmimi əpnapın əmə kəti otəfəri itimahal.

⁷ Kəni nati kəti mın, mətəu-inu itimahal aposil milahal rəha Kristo, iəkləhrun nəniən məmə nəkotəkeikei motisiai itimahal təhmen e iətəmi asoli milahal, mətəu iəməsloliən. Nian kəməutatig, nolien rəhatimahal timətig təhmen e məmə kəti iətəm tateh vivi nenətin mın, matol timətig o lah.

⁸ Nikitimahal tagiən məmə iəkləni pətigəm nanusiən təuvir, mətəu səniəmə məmə iəhləni pətigəm əmə, mətəu iəmhəl natimnati rəfin iətəm iəkləhrun nolien məmə otasiru e təmah. In təhmen məmə iəmhələfinə nəmiəgəhiən rəhatimahal,

mətəu-inu itimahal iəmhloлкекеи itəmah, kəni nəməhuva rəhatimahal nətəmimi.

⁹ Piak min mine nəuvinik min. ?Nikitəmah təhti, uə kəpə, uək əskasik iətəm iəmahlol? Nian itimahal iəməhləni pətigəm nanusiən təuvir rəha Uhgın kəm təmah, itimahal iəmahlol uək e nəhlmitimahal ləplapın mətəuarus=pən lapın o nosiən məni məmə iəslətapuəhiən o məni o təmah.

¹⁰ Itəmah mine Uhgın, nəmoteruh kəni motəhrun nəni pətigəmiən məmə nian iəməhlatig kitah min itəmah nəfaki min, noliən rəhatimahal in təhruahru, kəni Uhgın tətəgiən lan, kəni iətəmimi kəti təsosien nıpəgnəmtin kəti iətəm tərah o timahal.

¹¹ Itəmah nəkotəhrun məmə itimahal iəmahlol təuvir kəm təmah rəfin təhmen e tatə kəti tateh vivi nenətin min.

¹² Kəni e noliən kətiəh əmə, iahlem əskasik itəmah, kəni mahləfəri rəhatəmah nətəligiən, məhlətapuəh əskasik məmə nəmiəgəhiən rəhatəmah otəhruahru e nəhmti Uhgın, kəni nikin tagiən lan. Uhgın u, tətəuin e təmah məmə nəkəhuva e narməniğiən mine nəuviriən rəhan.

¹³ Kəni nian rəfin, itimahal iəhləni tagkiu kəm Uhgın mətəu-inu nian nəmotos nəghatiən rəha Uhgın iətəm nəmotətəu o timahal, kəni motos tatig e nikitəmah, kəni nikitəmah təsəhtiən məmə in nəghatiən rəha nətəmimi əmə, mətəu nikitəmah təhti məmə in nəghatiən rəha Uhgın, kəni pəhriən in nəghatiən rəhan. Kəni nəghatiən u tatol uək e nəmiəgəhiən rəhatəmah, u nətəm nəutəni nıpəhriənien lan.

14 Kəni piak mın mine nəuvinik mın. Nətəmimi imatəmah əhruahru ikin, kəmotol tərəh e təmah mətəu-inu nəməutəhatətə e Krısto İesu. İtəmah nəkotəhmen e nətəmimi rəha nıməfaki mın rəha Uhgın əpəha ikin Jutiə. İlah nətəm İsrəl əhruahru, mətəu rəhalah aru nətəmi asoli mın kəmotol nərahıən e lah nian kəmotəhatətə e Krısto İesu.

15 Nətəmi asoli mın u, kəmotuhamu İərməniğ İesu, mine iəni mın, kəni motəhgi pətəgəm itimah iəkohiet. Noliən rəhalah tatol niki Uhgın təsagiənıən, kəni ilah tiki mır mın o nətəmimi rəfin,

16 mətəu-inu nətəmi asoli mın u kətalkut məmə okotəniəhu itimah o nəghatiən kəm Nanihlua* mın məmə Uhgın otosmiəgəh ilah. E noliən əha, ilah kətoriarun rəhalah noliən tərəh mətəuarus təhmen. Mətəu rəueiu əha, niəməha mine nalpiniən rəha Uhgın tinuva o lah.

Pol təmolkeikei məmə oteruh ilah

17 Piak mın mine nəuvinik mın. Nian iəmhluvən isəu o təmah nian nəuan nəuvetin əmə, mətəu iəmhlokeikei pik məmə iəkləruh mın itəmah. Nipəhriənıən, nipətıtah isəu o tah mın mətəu nətəligiən rəhatah kətiəh. Kəni iəməhlalkut pik məmə iəklitəlig mihləruh itəmah,

18 mətəu-inu iəmhlokeikei məmə iəkluvnə o təmah. İəu, Pol, iəmalkut nian tepət, mətəu Setən təmahtipəsıg e suaru o timahal.

19 ?Təhro iəklolkeikei pik məmə iəkləruh mın itəmah? ?Tol lanəha mətəu-inu, nian İərməniğ İesu otuva mın, pəh mın u iəmlələhu=pən nətəligiən əskasik rəhatimahal e lah məmə ilah nəua uək təuvır rəhatimahal? ?Kəni nikitimahal otagiən

2:14 Uək 17:5 2:15 Uək 9:23,29; 13:45,50; 14:2,5,19 * 2:16 Nanihlua, İanihlua – Afın-to e tiksınəri.

min o pəh min? ?Kəni pəh min u in rəhatimahal nətəuiən iətəm nikitimahal otagiən e lah? ?Itəmah, uə kəpə? Əuəh, itəmah u.

²⁰ Nipəhriəniən, itimahal iəhlətəu təuvir o təmah, kəni nikitimahal tagiən o təmah.

3

¹ Tol lanəha, nian nikitimahal təməpəou kəni iuəkir nikitimahal titəgət, mətəu-inu itimahal iəkləruru məmə nətətatig təuvir uə kəpə, kəni itimahal iəmhlegəhan məmə iəu mine Sailəs iəkuatig Atens,

² iəmuahli=pinə Timoti məmə in otuvnə meruh itəmah. In piatah kəti iətəm tatol uək rəha Uhgın itimahal min o nəni pətigəmiən nanusiən təuvir rəha Krīsto. In təmuvnə o təmah məmə otasiru e təmah məfəri rəhatəmah nətəligiən, kəni mol itəmah nətəhtul əskasik e rəhatəmah nəhatətəiən,

³ məmə nərahian iətəm tətəva o təmah rəueiu, ko təsolian nikitəmah təhti pik. Nəkotəhrun rəkis məmə in nətəligiən rəha Uhgın məmə nətəmimi okotol tərəh e təh lanəha.

⁴ Nipəhriəniən, nian iəməhlatig kitah min itəmah, iəməhləkeikei məhləni kəm təmah məmə okol tərəh e təmah. Kəni itəmah nəkotəhrun vivi məmə tinuva mol nipəhriən lan təhmen əmə məmə itimahal iəmhləni mine.

⁵ Kəni o nati əha, nian iəməsəhruniən məmə natigian rəhatəmah təhrə, kəni nīkik təməpəou kəni iuəkir nīkik titəgət, kəni iəmahli=pinə Timoti məmə otuvnə meruh-to rəhatəmah nəhatətəiən,

məmə tatəskasik əhanəh, uə kəpə. İəməgin məmə e suaru kəti, Setən u iətəmimi rəha nəfən-əfəniən, in təməfən-əfən kəm təmah, kəni nəkotəmkarəpən e nəhatətəiən rəhatəmah, kəni uək rəhatimahal in tol nati əpnarın əmə.

Timoti təməni pətigəm nanusiən təuvir

⁶ Kəni rəueiu əha, Timoti təmitəlig=pa min o timlau, kəni matos nanusiən təuvir e rəhatəmah nəhatətəiən mine nolkeikeiən. Təməni=pa kəm timlau məmə nikitəmah tətəhti əhanəh itimahal, təhmen əmə məmə itimahal iəklolkeikei məmə iəkluruh itəmah.

⁷ Tol lanəha, piak min mine nəuvinik min, nati əpnarın iəmhlətiğ e nərahien, kəni mihlətəu nəhməiən, mətəu nanusiən rəha nəhatətəiən rəhatəmah təməfəri rəhatimahal nətəligiən o təmah.

⁸ Nian iəmləos nanusiən məmə nautəhtul əskasik əhanəh o İərməniğ, kəni iəklətəu məmə inhlos min nəmiəgəhiən.

⁹ Nian iəkləhtul e nəhmti Uhgın, nagiəniən rəhatimahal o təmah in iahgin, kəni iəkləni kəm Uhgın məmə nikitimahal tagiən pik o təmah.

¹⁰ E nian rəfin, lənian mine lapın, iəhləfaki əskasik məmə iəkluruh min itəmah, kəni mihləgətun itəmah e nati nak nəkotəruru əhanəh məmə rəhatəmah nəhatətəiən oteviə məskasik.

¹¹ Kəni pəh rəhatah Uhgın aru, u Tatə rəhatah, mine İərməniğ İesu rəhatah, kuol suaru rəhatimahal məmə iəkləvnə mihleh itəmah.

¹² Pəh İərməniğ otol nolkeikeiən rəhatəmah otepət məri məriəuəh o təmah mine nətəmimi

rəfin, təhmen e nolkeikeiən rəhatimahäl o təmah tepət.

¹³ Pəh in otol nikitəmah otəsanən məmə, nian İərməniğ İesu tətuvə mın ilah rəhan mın nətəmimi, kəni nəkotəhtul e nəhmti rəhatah Uhgın u Tatə rəhatah, kəni nəkotəhlan kəni noliən tərəh tikə e təmah.

4

Nəmiğəhiən rəhatəmah təkeikei mol Uhgın nikin tagiən

¹ Piak mın mine nəuvinik mın, rəueiu iəkəkeikei məğhati e natimnati mın nəuvein. İəmləgətun rəkis itəmah e noliən iətəm nəkotol məmə Uhgın nikin otagiən o təmah. Kəni pəhriən, onəkotol lanəha. Kəni rəueiu iəhlətapuəh o təmah kəni məhlətapuəh əskasik e İərməniğ İesu məmə nautol təhmın mın lanko.

² Otol lanəha mətəu-inu itəmah nəkotəhrun suaru iətəm iəmləgətun itəmah lan, kəni İərməniğ İesu təməfa nepətiən məmə iəkləgətun itəmah lan.

³ Nətəligiən rəha Uhgın məmə in təmələhu kalın itəmah məmə rəhan mın məmə nəkotol nati iətəm təhruahru vivi: sotohtəu-pəniən suaru rəha niyətan mine nəman iətəm kautit oneuən ilah mın.

⁴ Itəmah kətiəh kətiəh nəkotəkeikei motərməniğ e niyətitəmah e noliən iətəm təuvir məhruahru kəni kisiəi.

⁵ Sotoliən noliən rəha nitəu-pəniən nətəligiən əskasik o nit oneuəniən pətan uə iərman. Noliən əha rəha nətəm kəsotəfakiən motəruru Uhgın.

⁶ Kəni e natimnati mın əha, sotoliən tərəh e piatəmäh mın e nakləhiən e pətan rəha iətəmi pisin. İərmənig otol nalpiniən kəm nətəmimi mın u iətəm kautol noliən mın iətəm tol lanəha, kəni inhləni rəkis nati u kəm təmäh o nəhgi-pəriən itəmäh.

⁷ Tol lanəha mətəu Uhgın təməsauniən e tah məmə okotamikmik e nəhmtin, okotatig e nəmiəgəhiən iətəm kəmotələhu kalın məmə rəhan.

⁸ Tol lanəha, iətəm tətəuhlin nəmtahn e nəghatiən əha, səniəmə tətəuhlin nəmtahn kəm iətəmimi, mətəu tətəuhlin nəmtahn kəm Uhgın iətəm təməfa Nərmın Rəhan kəm təmäh.

⁹ Nəkotəhrun rəkis noliən rəha nolkeikeiən itəmäh iəfaki mın, kəni təsəhmeniən mın məmə iəkətei e nauəuə, mətəu Uhgın tinəgətun rəkis itəmäh o nolkeikeiən itəmäh mın.

¹⁰ Kəni pəhriən, nəkotalkeikei piatah mın rəfin ikin Masetoniə. Mətəu, piak mın mine nəuvinik mın, iəklətapuəh əskasik məmə nəkautol təskasik təhmın lanko lan.

¹¹ Itəmäh nəkotəkeikei motalkut o nitəu-pəniən suaru rəha nəmiəgəhiən iətəm in təməlinu, kəni motol aru rəhatəmäh uək, kəni nəkautol uək e nəhlmitəmäh məmə nauəniən rəhatəmäh mine natimnati mın otəhmen, təhmen əmə məmə iəmhləni mine kəm təmäh.

¹² Otol lanəha məmə rəhatəmäh nəmiəgəhiən otiuvi=pa nisialiən rəha nətəm ihluə mın, kəni itəmäh nəsotarəriəiən e suah kəti.

Nuvaian rəha İərmənig

13 Piak mın mine nəuvinik mın. İəklolkeikei məmə itəmah onəkotəhrun itəmah mın nəuvein u kinohmis rəkis, məmə kinəhro e lah. Kəni iəslolkeikeiən məmə itəmah nəkotasək təhmen e nətəmimi nətəm kəsotələhu-pəniən rəhalah nətəligiən e Uhgın u təhrun nauməhtuliən e nətəmimi e nımisiən. İlah okotəkeikei motasək pik. Mətəu kitah okəsotasək pikian, mətəu inu

14 kitah kəutəhatətə məmə İesu təmimis kəni məmiəgəh mın, kəni nikitah təhrun məmə nian İesu otuva mın, kəni Uhgın otol məmə, nətəmi mın u nətəm kinotəhatətə rəkis e İesu nian kəmohtmıs, okəhuva mın ilah İesu.

15 Kəni iəhləni kəm təmah nəghatiən əhruahru rəha İərmənig məmə, kitah u nətəm kəutəmiəgəh əhanəh məutətig mətəuarus nuvaiən rəha İərmənig, pəhriən kitah okəsotaupəniən e nətəmi mın u nətəm kəmotəupən mohmis.

16 Mətəu İərmənig əhruahru əmə otsipəri e negəu e neai meiuaiu=pa, kəni məni pətigəm əfəməh, kəni iətəmi asoli rəha nagelo mın otagət əfəməh, kəni nətəmimi okotətəu təui rəha Uhgın, kəni nətəmi mın u nətəm kinotəhatətə rəkis İesu nian kəmohtmıs, okotəmiəgəh motəupən motəri.

17 Kəni uərisig lan, kitah nətəm kəutəmiəgəh əhanəh, okotəri kitah mın ilah e nimali nəpuə məmə okoteruh İərmənig e magəuagəu. Kəni tol lanəha, okotətig kitah İərmənig naunun tikə.

18 Tol lanəha, otəfəri nətəligiən rəhatəmah mın e nəghatiən mın u.

5

¹ Piak mın mine nəuvinik mın. Təuvir əmə məmə iəsətəiən kəm təmah e nian əhruahru rəha natimnati mın əha,

² mətəu-inu itəmah nəkotəhrun rəkis məmə nian iətəm İərmənig otuva mın e nəhue niftəni u təhmen e iakläh iətəm tətuvə lapın, nian nətəmimi əpnəpın kotəruru məsotəhtul maruiən ohni.

³ Nian nətəmimi kəutəni məmə, “Natimnati rəfin təməlinu, kəni nərahian tikə,” kəni nalpiniən mine niəməha rəha Uhgın otuva uəhai əmə o lah, kəni ko nətəmimi kəsotəgimian, təhmen e pətan iətəm nəmtahn tətəhmə o neməkian, nəhməiən tətuvə uəhai əmə, kəni ko pətan əha otəsəgimian.

⁴ Mətəu piak mın mine nəuvinik mın, iateruh məmə nəsotəhtulian e nəpınəpuian e natimnati mın əha, kəni nuvaiən rəha nian əha otəsoliən itəmah nəkotəuit təhmen e nətəmimi u kotəuit nian iakläh kəti təmuva.

⁵ Itəmah rəfin nenəti nəhəgəhəgian mine nenəti nianian. Kitah səniəmə nətəmimi rəha lapın mine nəpınəpuian.

⁶ Kəni tol lanəha, pəh kəsotoliən təhmen e nətəmi mın u kəutəpili, mətəu pəh kotair kəni maüteruh vivi rəhatah nətəligian mine rəhatah noliən mın,

⁷ mətəu nətəmimi mın u kəutəpili, ilah kəutəpili lapın, kəni nətəmi mın u kəutəpis, ilah kəutəpis lapın.

⁸ Mətəu pəh kitah kotərmənig e noliən mın rəhatah, mətəu-inu kitah nətəmi rəha nianian. Pəh kotəskəlim noliən rəha nəhatətəiən mine nolkeikeian məmə nəpəlian kəti, inu təhmen e

5:2 Mat 24:42-43; 2Pitə 3:10; Nəh 3:3
21:34-35

5:5 Rom 13:12

5:3 Mat 24:39; Luk

soldiə kəti iətəm tətəfən napən təhmen e aiən iətəm tətəmähli pəsığ e nımankilahatəmi məmə nəpaliən kəti. Kəni pəh kotələhu=pən əskasik rəhatah nətəligiən e Uhgın məmə nəpaliən kəti, inu təhmen e soldiə kəti iətəm titaharu=pən kəfəfau əskasik kəmol e aiən iətəm tətəhtərain rəhn-kapə təmi məmə nəpaliən kəti.

⁹ Pəh kotal lanəha mətəu Uhgın təməsauin rəkisiən e tah məmə niəməha mine nalpiniən rəhan otuva o tah, mətəu təmitəpın itah məmə in otosmiəgəh itah e rəhatah İərməniğ İesu Kristo.

¹⁰ Təmimis o tah məmə kitah kotəhrun natigiən pəti kitah min nəmə kautəmiəgəh uə kəmoħmis.

¹¹ Tol lanəha, onəkotəfəri rəhatəmah min nətəligiən, kəni otasiru e təmah min məmə nəkotol nəhatətəiən rəhatəmah təskasik. Pəhriən, inu nolıən itəmah nəkotol u rəueiu.

Naunun nəghatiən rəha Pol

¹² Piak min mine nəuvinik min. Rəueiu iəklətapuəh o təmah məmə nəkotisiəi nətəmi min u kautol uək əskasik itəmah min ilah, kəni məutərməniğ e təmah e İərməniğ, kəni məutəgət asoli e təmah nian nəkotəmkarəpən motol tərəh.

¹³ Otisiəi vivi ilah motolkeikei ilah o uək iətəm kautol, kəni motatig e nəməlinuiən kəni məsotetetiən e təmah min.

¹⁴ Kəni piak min mine nəuvinik min, iəhlətapuəh əskasik məmə nəkotəgət əskasik e nətəmi min u kəutəlpah məsotoliən nati kəti. Otəfəri nətəligiən rəha nətəmi nikilah təpəou. Otasiru e nətəmi

rəhalah nəsanəniən tikə. Otol rəhatəmah nətəligiən təfəməh o nətəmiimi rəfin.

¹⁵ Nəmə iətəmi kəti otol nati kəti təsəhmenian e təmah, kəni itəmah nəsotalpiniən nitai nərahiən, mətəu nian rəfin, itəmah nəkotəkeikei motalkut məmə nəkotol təuvir kəm təmah min mine nətəpisiin pisiin min.

¹⁶ Nikitəmah otəkeikei mətagiən nian rəfin;

¹⁷ kəni motəghati kəm Uhgın e nəfakiən nian rəfin;

¹⁸ kəni nian rəfin otəni kəm Uhgın məmə nikitəmah tagiən, nati əpnapin nəkotatig e nəuviriən, uə nərahiən. Otol nati milahal əha mətəu-inu ilahal nəuia Uhgın o təmah e Kristo Iesu.

¹⁹ Sotalıfu əpisiən nigəm rəha Narmın Rəha Uhgın;

²⁰ sətəniən məmə nəghatiən iətəm Uhgın təməfən kəm iətəmi kəti in tol nati əpnapin əmə lan.

²¹ Otaupən pipim moteruh kəni motakil vivi natimnati rəfin, kəni otaskəlim tiəkis nati iətəm təuvir,

²² kəni motəpəh natimnati rəfin iətəm tərəh.

²³ Pəh Uhgın pisiin əmə iətəm in Uhgın rəha nəməlinuiən, otol itəmah məmə rəhan pisiin əmə u itəmah. Pəh Uhgın otol məmə nəmiəgəhiən rəfin rəhatəmah okotəhruahru, e narmitəmah mine e nətəligiən rəhatəmah mine e nipətitəmah. Kəni nipəgnəmtin kəti tikə mə otəhku=pən e təmah, nian rəhatah İərməniğ Iesu Kristo tətuva min.

5:14 2Təs 3:6,11

5:15 Rom 12:17; 1Pitə 3:9

5:16 Fil 4:4

5:18 Efəs 5:20

5:19 Efəs 4:30

5:22 1Jon 4:1

5:23 2Təs

²⁴ İətəm tətəuİN e təmäh, nian rəfin tatol rəhan nəghatİən, kəni in otol natimnati mİN əha.

²⁵ Piak mİN mine nəuvİNİK mİN. Otəfaki o timah.

²⁶ Otəni təuvİR kəm təmäh mİN təhmen məmə itəmäh kətİəh əmə e Kristo.

²⁷ E nərgİ İərməniğ, İətəni əskasİK kəm təmäh məmə nəkotafİN nauəuə u kəm piak mİN mine nəuvİNİK mİN rəfin.

²⁸ Pəh rəhatəmäh İərməniğ İesu Kristo otətuati e rəhan nəuvİRİən kəm təmäh.

Nauəuə Asim Rəha Uhg̃in Nəmtət̃iən Vi
The New Testament in the Whitesands language of
Tanna Island, Vanuatu
Niutesteman long Nərak, lanwis blong Whitesands
Tanna, Vanuatu

Copyright © 2014 Wycliffe Bible Translators, Inc.

© Wycliffe Bible Translators, Inc.

Language: Whitesands

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

913a182a-255f-5344-b6b0-0294ba221e87